

Saturday, April 25, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)**



HEAT WAVE

Tunhnaia khawlum lutuk kaihhnawih natna hrang hrang laka in ven nan mipuite chu nisaah awm tam lo tur leh tui in tam turin mithiam ten an chah.

Akashvani Aizawl News zawhna chhangin, Ebenezer Medical Center-a Medical Director Dr Vanlalsiama Chhangte chuan tunhnai khaw lum lutuk avang hian khawlum kaihhnawih natna hrang hrang- heatstroke, chauh leh zawi te a awm thei a ti a. Hemi laka lo inven nan hian khawlum leh nisaah rei lutuk awm lovin, daihhlum leh thingkung hnuaia awm a pawimawh a ti a. Hei bakah hian inbual, taksa tih daih leh fan hnuaia awm bakah tui leh thil tuiril lam chu in thin dan pangngai aia in tam a ngai a ti a, taksa mamawh zat ang tui kan in tam em tih mahnia hriat theihna tha tak chu zun rawng a var thei ang ber a nih thu a sawi bawk a ni.

Nimin khan ICAR RESEARCH COMPLEX FOR NEH REGION, Kolasib chuan khawchin mila ran leh thlai enkawl dan inkaihhraina tichhuakin, khua a lum chhoh bakah thli leh tek tla a awm chhoh zeuh zeuh hmel avangin ran vulhte hmun himah dah thin turin ran vulhtute an chah a. Extended Rain Forecast System (ERFS) in a tarlan danin April ni 29 atanga May ni 5 inkar hian Mizoram chhunga ruah tla chu dan pangngai aia sang zaa 180.68 a ni dawn a ti a. Ruah a sur hnaih maitheih avangin tlangram leh hmun awiha huan leh lo neite chu vaimim, behliang, mai, um ei leh thlai dangte tuh tan tawh turin a chah a ni.



BIAL INKHAWMPUI

Mizoram Presbyterian Kohhran bial hrang hrangah Bial Inkhawmpui neih mek a ni a, vawiin hian rorel inkhawm neih niin, naktuk Pathianni zanah Bial inkhawmpui hi a tiak ang.

Synod thuchhuah tarlan danin, Nizan, Zirtawpni zanah Palai lawmna & Report Inkhawm neih a ni a, vawiin Inrinni hian rorel niin, zanah vantlang Pathian Biak inkhawm neih a ni ang. Naktuk, Pathianni Chawhma, Chawhnu leh Zanah te vantlang Pathian Biak inkhawm neih a ni leh dawn a. Chawhnu inkhawmah Lalpa Zanriah Sakramen theh a ni ang a, zan inkhawmah Bial Chairman kalchhuak turten Valedictory Sermon an sawi ang.

Synod statistic thar berin a tarlan danin, kum 2024 atanga 2025 inkarah khan Mizoram Synod hnuaiah Pastor bial 310 awmin kohhran 1,185 a awm mek a, kohhran member nuai 6 sing 4 & 6,891 an awm bawk a ni.



UPC

United Pentecostal Church of North East India inkhawmpui lian ber, General Conference vawi 58-na chuan vawiin khan LPS Arena, Falkland Vengah rorel inkhawm neiin, nasa zawka ruihhlo do kawnga hmalak an rel. Kum 2026-28 UPC-NEI General Superintendent atan Rev. Zohmingthanzama an thlang nawn a ni.

Ningani zan aṅanga ṅan UPC-NEI General Conference hi naktuk zanah a ṅiak dawn a, inkhawmpui thupui atan 'Isua Krista lo kal lehna' Thupuan 22:12 hman a ni.

Vawiin chawhma dar 10:30 khan LPS Arena-ah General Kohhranpui Rorel Inkawm an nei a, UPC North East India (NEI) huam chhunga rawngbawlina kawnga hmalak dan tur hrang hrang rel niin, chu'ng zingah chuan India hmarchhak pumhuapa ruihhlo do kawnga hmalak rawtna chu an pawm a, General Hruaitute kaihhruai Executive Board bawhzui turin an dah.

Tukin khan Mualpui Kohhran Biak-inah UPC-NEI General hruaitute thlanna neih niin, kum 2026-28 chhunga General Superintendent atan General Suptd. nilai Rev. Zohmingthanzama thlan nawn a ni a, General Secretary Rev. Lalmalsawma Sailo leh General Treasurer Rev. R. Laichhingpuia te pawh an chanvo ngaiah thlan nawn leh an ni bawk.

Inkhawmpui report bu-in a tarlan dan chuan, UPC-NEI hnuaiah hian District 12 leh Mission Field 11 awmin, kohhran member nuai 1 sing 2 & 3,199 an awm mek a ni.



KOLASIB DC

Kolasib Deputy Commissioner Pu H. Dolianbuaia chuan Thingdawl-a sawrkar hmun pawimawh hrang hrang a tlawh kual a. Jawahar Navodaya Vidyalaya (JNV), Thingdawl Vidyalya Management Advisory Committee (VMAC) Meeting a hmanpui bawk.

Tarlan danin, JNV-ah hian session 2025-26 chhungin zirlai 77 ten admission an ti a. Pawl 10 board exam-ah zaa 100 pass percentage hmu in, Pawl 12 result hi nghah mek a ni.

Kolasib DC chuan tualchhung mite hnena JNV pawimawhna thehdarh a tul thu a tarlang a. Zirlaite Hindi tawng thiam kawngah leh zirna bakah thiam thil dang (co-curricular activities) ah te hma an sawn chu lawmawm a tih thu sawiin, sikul tha taka enkawltu Principal Pu Hari Om Shukla chungah lawmthu a sawi bawk.

Hemi hnu hian DC chuan Thingdawla Veterinary Farm a tlawh a, District Veterinary Officer chuan National Highway 4-lane laih mekin Veterinary ram a rawn tan tlang chungchanga an harsatnate DC hnenah hian a lo thlen nghal bawk.

District Agriculture Centre tlawh bawkin, Lab hmanga alu chi tha leh a tiak siamchhuahna hmun te a tlawh a, agriculture hmasawn zel dan tur an sawiho a ni.

DC hian Horticulture Centre of Excellence, Thingdawl a tlawh leh a. He hunah hian thawktuten an hnathawh mek te, thei, pangpar leh thlai tiak an chin leh an enkawl dan te an lo hrihfiah a ni.

